



13. november 2025

UKA 2025/65

Inuusuttut suliffissaaleqisut ikilisarnissaanut suliniarnerup annertusarnerani qanoq ililluta politikkikkut suliffeqarfiit innuttaasunik tapersersortarialinnik suliffissaqartitsisut siuarsarsinnaanerigut apeqquteqaat aallaavigalugu oqallinnissamik siunnersuut.

Inatsisartunut ilaasortaq Margrethe Thårup Andersen, Demokraatit

Siullermik apeqquteqaat aallaavigalugu oqallisissamik siunnersuuteqartoq Magrethe Thårup Andersen, Demokraatit sammisamut soqutiginaartumut Siumumiit qutsavigerusupparput.

Inuusuttut meeqqat atuarfiannit naammassereersimanermi kingorna ilinniartinnut allanulluunniit ingerlaqqinngitsoortartut (sulinngitsut, ilinniannngitsut piginnaangorsarneqanngitsullu) peqataalersinniarlugit ukiuni tulluittuni naalakkersuinikkut iliuuseqarnikkut pinngitsoorarik immikkut ittumik suliniuteqarfigineqarnissaat Siumup anguniagaraa.

Siumumiit nuannaarutigaa inuusuttut suliffissaaleqisut ingerlaqqinngitsoorsimasullu ikorfartorniarlugit Siu Tsiu pilersinneqarsimammat, taamaakkaluartoq maluginiarneqarsimavoq Siu Tsiu ilaatigut suliffeqarfinnut namminersortunut unammillertumik inissikkiartuaalersimasoq, tamannalu siunertaanngimmat siunertaassanngimmallu Siu Tsiup iluani ingerlaatsimut sinaakkusiinissaq ersarisoq Siumumiit pisariaqarsorivarput.

Nunatut ineriartornitsinni ilinniarsimasut amerliartornissaat nunatta pisariaqartippaa, taamaattumillu inuusuttunnguit sulinissamut faginilu piginnaasaminnik nukittorsaannissamut kajumissuseqalersimasut iluatigalugit ilinniagaqarnissamut aqqutissiuunneqarnissaat kaammattuutigerusupparput.

Taassuma saniatigut eqqaarusupparput Majoriami ullumikkut atuagarsortitsinngikkaluarluni inuusuttunut aamma piginnaangorsaanerit periarfissaammata, aammalu taakku iluatsissimasutut ingerlalluartaasa nukittorsaannarneqarnissaat pisariaqarmat.

Apeqquteqaat aallaavigalugu oqallisissamik siunnersuuteqartoq qutsavigalugu oqallilluarnissassinik kissaappassi

Anders Olsen, Siumut